

Dan politik fodre zanmen asize

Sa i en stetment ki bann politisyen ek leksperyans i'n toutan konseye. E malgre tou lobstak ki Parti Lepep i rankontre, erezman ki in kas rikord an term progre pour pei e pep Seselwa.

Parfwa dan pe fer son mye pour bouz pli devan, serten keksoz i al mal. Me lentansyon nou bann liderz e nou Parti pa'n zanmen pour fer soufer Seselwa, oswa rekil Sesel an aryer.

Pandan sa dernyen 10 an, Sesel i'n nobou sov son lekonomi, pey son bann det nasyonal, protez Sesel kont latak piratri, mentenir son sikse sosyal e Sesel i'n monte pour vin en pei ki par tet zabitan i annan en

reveni o. Sesel i'n fer bokou sikse ki bokou gran pei pa'n kapab fer.

Selman de defi ki'n ronze nou sosyete ; kot en poursantaz lazenes Seselwa i adikt eroin e serten adilt lalkol, ki konsekanman i'n anmenn laprovrete dan lakour zot fanmir. Me i annan en travay entans ki pe ganny fer pour rezourd tousala. Kanmenm lopoziyon ti kont politisyen vin Minis, ozordi se sa de politisyen ek bokou

leksperyans dan lafason pour travay ek dimoun, ki pe rezourd sa de pli gro defi nou sosyete.

Prensip ki SPUP ti etabli an 1964 i ankor relevan pour lepep Seselwa. Nou pep i bezwen legalite dan loportinite, linite, akse a ledikasyon, lasante, lozman, en bon saler, lanplwa eksetera. Parti Lepep pa malisyè ; Parti Lepep i'n toutan annan en bon program e travay serye pour devlopman Sesel.

Koz en kou lo sikse

P2

Mersi pour zot partisipasyon

Mersi pour zot partisipasyon

Prezidan Parti Lepep, Msye Vincent Meriton, lo non Parti, i oule remerisye tou aktivis/siporter ki ti rann lapel pour partisip dan en seri miting rezyonal ki ti organize resaman.

« Nou tou nou'n dakor ki nou bezwen rekonekte e reste konekte. Ki nou bezwen travay dan lonnekte e pli dir ki oparavan. Nou bezwen kontinyen reste opouvwar e reganny nou Lasanble pour kontinyen pran swen ek lepep Seselwa. Mon repete, ki nou pa'n parfe, ki erer i'n ganny komet parfwa, me nou'n gard nou parol pour travay e devlop Sesel e rasir progre Seselwa baze lo bann prensip fondamantal nou Parti etabli par Msye Rene an 1964. »

Koz en kou lo sikse

Laverite ki personn pa koz lo la ; se sikse nou pei pandan sa 40 an.

Menm si ozordi i annan en lopozisyon ki kontrol Lasanble Nasyonal, se nou Parti ki'n travay pour tou dimoun rekolte- enkli zot osi. Pour donn lepep akse a bann servis de baz gratwit ki devlop zot pour ganny ankor bokou plis loportinite dan sa pei, i anmenn bokou presyon lo en pti lekonomi. I osi fer ki i difisil satisfere tou dimoun. Me lentansyon sa bann polisi i bon- zot angrave dan nou prensip e nou Parti i'n toultan gard son promes.

LASANTE

Gouvernman i donn Lasante 30 milyon rouni par lannen pour tretman aletranze pour bann pasyan adilt. Kant a zanfan, zot tretman i ganny asire anba Lazans Proteksyon Sosyal e son bidze par lannen i apepre 4 a 5 milyon rouni. Nou pa ni bezwen kalkil sa pandan 40 an me pour sa dernyen 10 an. I en kantite larzan ki governman i depanse pour donn lasante Seselwa- e sa i zis pour bann ki al trete aletranze.

LEDIKASYON

Pour etidyan ki fer enn an liniversite, governman i depans ziska en milyon rouni par lannen. Nou annan pour multipli sa pour etidyan ki fer 2 ziska menm 6 an letid dan diferan liniversite otour lemond. Gouvernman depi 1977 pe prodwi pilot, dokter, enzenyer, avoka, travayer IT e en kantite lezot profesyonnel dan diferan karyer.

Tandis ki zanfan depi lakres ziska S5 zot oblize ganny en ledikasyon gratwit. Sa ki fer byen i kontinny zot ledikasyon dan pos segonder e bann ki pa kalifye zot annan sans al devlop zot pour aprann en travay pour zot antre dan lanplwa.

LOZMAN

2, 129 fanmir Seselwa i'n ganny asiste dan sa dernyen 7 an. Gouvernman i'n depans en kantite larzan, avek sipor son bann zanmi tel ki Gouvernman UAE pour donn Seselwa lakaz. Ek sa proze 24 younit lakaz dan 24 distrik- d'isi 2019 ankor 600 fanmir pour ganny asiste.

Gouvernman pou fer sir ki sa prensip fondamantal ki asire ki sak fanmir Seselwa i annan en bon lozman pou kontinyen.

Antouka tou sa benefis dan sa 3 sektor prensipal pe kontinyen ozordi e pou kontinyen dan lavenir anba sa menm governman.

BENEFIS POUR TRAVAYER

Gouvernman i'n anonse ki sa linisyativ pour fer reform dan sistenm taks avek bi met plis larzan dan pos Seselwa pou ganny enplimante an Zanvye. Lannen pase, ti annan labolisyon taks lo saler ki R8555.50. Lafen Zanvye 2018, serten saler pou war taks redwir ki pou benefisye travayer avek reveni ba e mwayen, lakonpanyen piblik e prive pa pou tir taks ler zot pey gratwite, 13enm mwan saler, e bonous.

Seselwa ki'n toultan priorite e pou reste priorite Gouvernman Sesel. Parti Lepep i fer fas avek lobstak me i pa dekouraze. I leve e kontinyen travay pour lepep.